




漢學堂經解

逸書考

九家易集注

上經

乾

大哉乾元

陽稱大六爻純陽故曰大元者氣之始也
所生天之象也觀乾之始以知天德惟天
爲大惟乾則之故曰大哉元者氣之始也

集解

乃統天

乾之爲德乃統繼天道與天合化也

集解

亢龍有悔盈不可久也

陽當居五今乃居上故曰盈也亢極失位
當下之坤三故曰盈不可久若太上皇者
也下之坤三屈爲諸侯故曰悔者也

集解

元者善之長也

乾者君卦也六爻皆當爲君始而大通君

德會合故元爲善之長也

集解

亨者嘉之會也

通者謂陽合而爲乾衆善相繼故曰嘉之

會也

集解

庸行之謹

以陽居陰位故曰謹也庸常也謂言常以

信行常以謹矣

集解

善世而不伐

陽升居五處中居上始以美德利天下不言所利卽是不伐故老子曰上德不德是

以有德此之謂也

集解

時乘六龍

謂時之元氣以王而行履涉衆爻是乘六

龍也

集解

坤

坤元亨利牝馬之貞君子有攸往先迷後得

主利

坤爲牝爲迷

集解

至哉坤元

謂乾氣至坤萬物資受而以生也坤者純陰配乾生物亦善之始地之象也故又歎

言至美

集解 義海撮要節引

柔順利貞君子攸行

謂坤爻本在柔順陰位則利正之乾則陽

爻來據之故曰君子攸行

集解

象曰履霜堅冰陰始凝也馴致其道至堅冰也

霜者乾之命也堅冰者陰功成也謂坤初

六之乾四履乾命令而成堅冰也此卦本
乾陰始消陽起于此爻故履霜也馴猶順
也言陽順陰之性成堅冰矣初六始姤姤
爲五月盛夏而言堅冰五月陰氣始生地
中言始于微霜終至堅冰以明漸順至也

集解

魏濬易義古象通引馴猶順也言順陰之性而成堅冰

象曰六二之動直以方也

謂陽下動應之則直而行布陽氣于四方

也

集解

其血元黃

實本坤體未離其類故稱血焉血以喻陰

也元黃天地之雜言乾坤合居也

集解

而動也剛

坤一變而成震陰動生陽故動也剛

集解

發于事業

天地交而萬物生也謂陽德潛藏變則發

見若五動爲比乃事業之盛

集解

爲其兼

晁氏同

于陽也故稱龍焉

陰陽合居故曰兼陽謂上六坤行至亥下

有伏乾陽者變化

晁氏作陰陽變化

以喻龍焉

集解

晁氏

象旨引至陰陽變化下作蓋以

變化可象者非龍不能也是約舉之辭

屯

象曰雲雷屯

雷雨者興養萬物今言屯者十二月雷伏

藏地中未得動出雖有雲雨非時長育故

言屯也

集解

十年乃字反常也

陰出于坤今還爲坤故曰反常也陰出于坤謂乾再索而得坎今變成震中有坤體故言陰出于坤今還于坤謂二從初卽逆應五順也去逆就順陰陽道正乃能長養

故曰十年乃字

集解

上六乘馬班如泣血漣如

鄭剛中引注上六乘陽故班如

上六乘陽故班如也下二四爻雖亦乘陽

皆更得承五憂解難除今上无所復承憂難不解故泣血漣如也體坎爲血伏離爲

目互艮爲手掩目流血泣之象也

集解

需

六四需于血出自穴

雲從地出上升于天自地出者莫不由穴

故曰需于血出自穴也

集解

象曰需于血順以聽也

雲欲升天須時當降順以聽五五爲天也

集解

象曰酒食貞吉以中正也

謂乾二當升五正位者也

集解

訟

象曰以訟受服亦不足敬也

初二三四皆不正以不正相訟而得其服

故不足敬也

集解

師

初六師出以律

坎爲法律也

集解

易觀餘引坎爲律

九二在師中吉无咎王三錫命象曰在師中

吉承天寵也

雖當爲王尙在師中爲天所寵事克功成

故吉

吉一作言

无咎二非其位蓋謂武王受命

而未卽位也受命爲王定天下以師故曰

在師中吉

集解義海撮要

小畜

象曰風行天上小畜

風者天之命令也今行天上則是令未下

行畜而未下小畜之義也

集解

象曰夫妻反目不能正室也

易窺餘引注同

四互體離離爲目也離既不正五引而上

三引而下故反目也輿以輪成車夫以妻

成室今以妻乘夫其道逆故不能正室

集解

象曰有孚攣如不獨富也

象旨孚九家易指下三爻

有信下三爻也體巽故攣如如謂連接其

鄰鄰謂四也五以四陰作財與下三陽共

之故曰不獨富也

集解易窺餘引五以四陰至未作作爲

履

說而應乎乾

動來爲兌而應上故曰說而應乎乾也以
喻一國之君應天子命以臨下承上以異
據下以說其正應天故虎爲之不啞人也

集解

象旨引承上以異據下以說

是以履虎尾不啞入亨

虎尾謂三也三以說道履五之應上順于
天故不啞入亨也能異說之道順應于五
故雖踐虎不見啞噬也太平之代虎不食

人亨謂于五也

集解

泰

君子道長小人道消也

謂陽息而升陰消而降也陽稱息者長也

起復成巽萬物盛長也陰言消者起姤終

乾萬物成熟成熟則給用給用則分散故

陰用特言消也

集解

不戒以孚中心願也

乾升坤降各得其正陰得承陽皆陰心之

所願也

集解

六五帝乙歸妹以祉元吉

五者帝位震象稱乙是爲帝乙六五以陰處尊位帝者之姊妹五在震後明其爲妹也五應于二當下嫁二婦人謂嫁曰歸故言帝乙歸妹謂下居二以中和相承故元

吉也

集解

小曰以祉元吉中以行願也

窺餘引注同無于字也字

五下于二而得中正故言中以行願也

集解